

---

OFFERYNNAU STATUDOL CYMRU

---

**2012 Rhif 283 (Cy.47)**

**DIOGELU'R AMGYLCHEDD, CYMRU**

**Rheoliadau Tir Halogedig (Cymru) (Diwygio) 2012**

<i>Gwnaed</i>	- - - -	3 Chwefror 2012
<i>Gosodwyd gerbron Cynulliad Cenedlaethol Cymru</i>	- -	7 Chwefror 2012
<i>Yn dod i rym</i>	- -	6 Ebrill 2012

Mae Gweinidogion Cymru yn gwneud y Rheoliadau hyn drwy arfer y pwerau a roddwyd gan adrannau 78C(8), (9) a (10), 78G(5) a (6) a 78L(4) a (5) o Ddeddf Diogelu'r Amgylchedd 1990(1) ac sydd bellach wedi eu breinio ynddynt hwy(2).

Cyn gwneud y Rheoliadau hyn, mae Gweinidogion Cymru wedi ymgynghori â'r Cyngor Cyfiawnder Gweinyddol a Thribiwnlysoedd, ac mae'r Cyngor hwnnw wedi ymgynghori â Phwyllgor Cymru a Phwyllgor yr Alban yn unol ag adran 44 o Ddeddf Tribiwnlysoedd, Llysoedd a Gorfodaeth 2007(3) a pharagraff 24 o Atodlen 7 iddi.

**Enwi, cychwyn a chymhwyso**

1.—(1) Enw'r Rheoliadau hyn yw Rheoliadau Tir Halogedig (Cymru) (Diwygio) 2012 a deuant i rym ar 6 Ebrill 2012.

(2) Mae'r Rheoliadau hyn yn gymwys o ran Cymru.

**Diwygiadau i Reoliadau Tir Halogedig (Cymru) 2006**

2.—(1) Mae Rheoliadau Tir Halogedig (Cymru) 2006(4) wedi eu diwygio fel a ganlyn.

(2) Yn rheoliad 3 (llygru dyfroedd a reolir)—

(a) yn lle paragraff (b) rhodder—

- 
- (1) 1990 p. 43. Mewnosodwyd adrannau 78C, 78G a 78L gan adran 57 o Ddeddf yr Amgylchedd 1995 (p. 25). Mae adran 78C(10) wedi'i diwygio'n rhagolygol gan adran 86 o Ddeddf Dŵr 2003 (p. 37). Diwygiwyd adran 78L(4) gan adran 104 o Ddeddf Cymdogaethau Glân a'r Amgylchedd 2005 (p. 16) a Rhan 10 o Atodlen 5 iddi. Gweler y diffiniad o "prescribed" a "regulations" yn adran 78A(9).
- (2) Trosglwyddwyd swyddogaethau'r Ysgrifennydd Gwladol o dan adrannau 78C, 78G a 78L o Ddeddf Diogelu'r Amgylchedd 1990, i'r graddau y maent yn arferadwy o ran Cymru, i Gynulliad Cenedlaethol Cymru yn rhinwedd erthygl 2 o Orchymyn Cynulliad Cenedlaethol Cymru (Trosglwyddo Swyddogaethau) 1999 (O.S. 1999/672) ac Atodlen 1 iddo. Yn rhinwedd adran 162 o Ddeddf Iywodraeth Cymru 2006 (p. 32), a pharagraff 30 o Atodlen 11 iddi, trosglwyddwyd y swyddogaethau hynny wedyn i Weiniogion Cymru.
- (3) 2007 p. 15. Mae'r termau Saesneg cyfatebol, sef "Welsh Committee" a "Scottish Committee", wedi eu diffinio ym mharagraff 28(1) o Atodlen 7 i'r Ddeddf honno.
- (4) O.S. 2006/2989 (Cy. 278), y mae diwygiadau iddo nad ydynt yn berthnasol i'r Rheoliadau hyn.

- (b) pan fydd y tir yn effeithio ar ddyfroedd a reolir, ac o ganlyniad—
- (i) nid yw'r dyfroedd hynny yn bodloni neu nad ydynt yn debygol o fodloni'r maen prawf ar gyfer y dosbarthiad sy'n gymwys i'r disgrifiad perthnasol o ddyfroedd a bennir mewn rheoliadau a wneir o dan adran 82 o Ddeddf Adnoddau Dŵr 1991<sup>(5)</sup> (dosbarthu ansawdd dyfroedd); neu
  - (ii) ar gyfer dyfroedd a reolir sydd wedi eu dynodi fel ardaloedd gwarchoddedig o dan Gyfarwyddeb 2000/60/EC Senedd Ewrop a'r Cyngor sy'n sefydlu fframwaith ar gyfer gweithredu Cymunedol ym maes polisi dŵr<sup>(6)</sup>, nid yw'r dyfroedd hynny yn bodloni'r amcanion amgylcheddol sy'n gymwys iddynt o dan y Gyfarwyddeb honno (ac eithrio'r ardaloedd gwarchoddedig a restrir ym mharagraffau (i), (iv) a (v) o Atodiad IV i'r Gyfarwyddeb honno); neu<sup>(7)</sup>; a
- (b) ym mharagraff (c)(ii), yn lle “o fewn strata tanddaearol”, rhodder “mewn strata tanddaearol o fewn y parth dirlawnder”.
- (3) Yn rheoliad 11 (addasu hysbysiad adfer), ar ôl paragraff (2) mewnosoder—
- “(3) Dim ond mewn perthynas ag apelau a wneir yn unol â rheoliad 8(1) cyn 6 Ebrill 2012 y mae'r rheoliad hwn yn gymwys.”
- (4) Yn Atodlen 2 (iawndal am hawliau mynediad etc)—
- (a) ym mharagraff 5(3) yn lle “Tribiwnlys Tiroedd” rhodder “Uwch Dribiwnlys”;
  - (b) ym mharagraffau 6(2)(c) a 6(3) yn lle “y Tribiwnlys Tiroedd” rhodder “yr Uwch Dribiwnlys”; ac
  - (c) yn lle paragraff 6(4), rhodder—
- “(4) Mewn perthynas â phenderfynu unrhyw gwestiwn o'r fath, mae adran 4 o Ddeddf 1961 (costau)<sup>(7)</sup> i'w chymhwyso fel petai'r canlynol wedi eu gwneud—
- (a) bod y cyfeiriad at adran 1 o'r Ddeddf honno yn gyfeiriad at is-baragraff (3) o'r paragraff hwn;
  - (b) bod y cyfeiriadau at yr awdurdod caffael yn gyfeiriadau at y person priodol; ac
  - (c) bod cyfeiriadau at yr hawlydd yn gyfeiriadau at y grantwr.”

3 Chwefror 2012

*John Griffiths*  
Gweinidog yr Amgylchedd a Datblygu  
Cynaliadwy, un o Weinidogion Cymru

---

(5) 1991 p. 57.

(6) OJ Rhif L327, 22.12.00, t.1.

(7) 1961 p. 33. Diwygiwyd adran 4 gan baragraffau 36 a 39 o Atodlen 1 i Orchymyn Trosglwyddo Swyddogaethau'r Tribiwnlysoedd (Tribiwnlys Tiroedd a Diwygiadau Amrywiol) 2009 (O.S. 2009/1307).

---

## EXPLANATORY NOTE

*(Nid yw'r nodyn hwn yn rhan o'r Rheoliadau)*

Mae'r Rheoliadau hyn, sy'n gymwys o ran Cymru, yn diwygio Rheoliadau Tir Halogedig (Cymru) 2006 ([O.S. 2006/2989 \(Cy.278\)](#)) (“Rheoliadau 2006”).

Mae rheoliad 2(2) yn diwygio'r amgylchiadau a nodir yn rheoliad 3(b) (llygru dyfroedd a reolir) o Reoliadau 2006 lle y mae'n ofynnol i dir halogedig, sy'n effeithio ar ddyfroedd a reolir, gael ei ddynodi yn safle arbennig. Mae'r diwygiad hwn yn cymryd ystyriaeth o ardaloedd gwarchoddedig o dan Gyfarwyddeb 2000/60/EC Senedd Ewrop a'r Cyngor sy'n sefydlu fframwaith ar gyfer gweithredu Cymunedol ym maes polisi dŵr (OJ Rhif L327, 22.12.00, t.1).

Mae rheoliad 2(2) hefyd yn diwygio rheoliad 3(c) (llygru dyfroedd a reolir) o Reoliadau 2006 i gymryd ystyriaeth o'r diffiniad a ddiweddarwyd o “controlled waters” yn adran 78A(9) o [Ddeddf Diogelu'r Amgylchedd 1990 \(p. 43\)](#).

Mae rheoliad 2(3) yn cyfyngu ar gymhwysiad rheoliad 11 (addasu hysbysiad adfer) o Reoliadau 2006 i apelau sy'n cael eu cychwyn cyn 6 Ebrill 2012. O ran yr apelau hynny, mae rheoliad 11 yn darparu ei bod yn ofynnol i Weinidogion Cymru, cyn iddynt addasu hysbysiad adfer mewn modd a fyddai'n llai ffafriol i'r apelydd neu i unrhyw berson arall y cyflwynwyd yr hysbysiad iddo, hysbysu'r personau hynny a chaniatáu iddynt gyflwyno sylwadau a chael eu gwranddo mewn perthynas â'r addasiad arfaethedig.

Mae rheoliad 2(4) yn diwygio Atodlen 2 i Reoliadau 2006 i adlewyrchu'r newidiadau a achoswyd gan Orchymyn Trosglwyddo Swyddogaethau'r Tribiwnlysoedd (Tribiwnlys Tiroedd a Diwygiadau Amrywiol) 2009 ([O.S. 2009/1307](#)) a drosglwyddodd swyddogaethau'r Tribiwnlys Tiroedd i'r Uwch Dribiwnlys ac a ddiddymodd y Tribiwnlys Tiroedd. Mae rheoliad 2(4) hefyd yn diwygio paragraff 6(4) o Atodlen 2 i Reoliadau 2006 i ddileu'r cyfeiriadau at adran 2 a ddiddymwyd o [Ddeddf Iawndal Tir 1961 \(p. 33\)](#) ac yn darparu ar gyfer cymhwysiad priodol cyfeiriadau penodol.

Ystyriwyd Cod Ymarfer Gweinidogion Cymru ar wneud Asesiadau Effaith Rheoleiddiol mewn perthynas â'r newidiadau i'r drefn tir halogedig. O ganlyniad, paratowyd asesiad effaith rheoleiddiol o'r costau a'r buddiannau sy'n debygol o ddeillio o gydymffurfio â'r newidiadau i'r drefn tir halogedig, gan gyfeirio at brif effeithiau'r Rheoliadau hyn. Mae copi ar gael gan: Yr Adran Amgylchedd a Datblygu Cynaliadwy, lywodraeth Cymru, Parc Cathays, Caerdydd, CF10 3NQ. Nid oes asesiad effaith rheoleiddiol ar wahân wedi cael ei wneud ar gyfer y Rheoliadau hyn.